



Michael natus est apud Soranenses in Silesia Anno circiter 1520. Ibi cum prima literarū fundamenta iecisset, sese hinc inde ad Academias contulit, atq; præsertim apud Saxones præclaram sibi eruditionem comparauit. In primis autem Hebraicæ, Græcæ, & Latinæ linguæ incubuit, & earū magnum sibi usum comparauit. Postea quoq; Philosophiæ studium coniunxit, & in arte Poëtica feliciter uersatus fuit. Hac eius eruditione factum, ut in celebri monasterio Ilfeldēsi reformato, atq; in præclaram scholam conuerso, ipse præceptor & moderator constitutus fuerit. In eo loco iuuentutem omni genere literarum instituit atq; suis lucubrati-

nibus omnibus innotescit. Homerum enim, Theognidem, Pindarum, & multos alios Græcos Poëtas optimè uertit, atq; locos obscuriores suis scholijs illustrauit. Hac ratione ipse etiamnum magna dexteritate pergit, & apud Septentrionales Germanos magnum sibi nomen comparauit. Sperandum etiã literarum studiosos breuè plura alia eaq; utilissîma ingenij monumenta ab eodem accepturos, id quod etiam ex animo optant. Anonymos.